



Inatsisartunut ilaasortaq
Peter Olsen, Inuit Ataqtigiit

**Eqqumiitsuliornermik Ilinniarfiup Nuummiit Aasiannut nuunneqarnissaa pillugu §
37 malillugu apeqqutinut akissut.**

Asasara Peter Olsen,

Inatsisartut suleriaasiat naapertorlugu Eqqumiitsuliornermik Ilinniarfimmut atatillugu
apeqqutigisannut qujanaq. Apeqqutit matuma kingulliini akissuteqarfigissavakka.

Aallaqqaasiullugu oqaatigerusuppara Ilinniartitaanermut, Kultureqarnermut,
Ilisimatusarnermut Ilageeqarnermullu Naalakkersuisoqarfiup 2017-ip naalernerani
ilinniartitaanermut tunngassuteqartunik iluarsaaqqinniarluni sulineq aallartimmagu.
Ataqtigiissumik eqaatsumillu ilinniartitaanerit aaqqissuunneqarsimanissaat
anguniagaavoq. Taamaaliornissamut pisariaqartitat ilagaat illoqarfinnik
ilinniarfeqarfiusunik pilersitsisoqarnissaa. Illoqarfiit meeqqat atuarianni 9. - 10. klassit,
ilinniarnertuunngorniarniit aamma inuussutissarsiutinut ilinniarfiit akornanni
qaninnerusumik suleqatigiiffiusut inuusuttunut atuarnerminnik naammassinnereersunut
ilinniartitaanernik amerlanerusunik aqqutissiuussinissamik anguniagaqarfiusut.
Iluarsaaqqinniarluni sulinermi Aasiaat illoqarfittut ilinniarfeqarfiusussanut
tamakkununga ilaapput. Taamaaliornikkut ilinniartitaanernut tunngassuteqartuni
sunniivigeqatigiissitsisoqarsinnaalissaaq, soorlu Eqqumiitsuliornermut Ilinniarfiup
Aasiannut inissinneqaruni iluaqutigisinnaasaanik.

**1. Eqqumiitsuliornermut ilinniarfiup Nuummiittup Aasiannut
nuunneqarnissaata pilersarusiorneqarnera sumut killippa? Qaqugu
Aasiannut nuunneqarnissaa naatsersuutigineqarpa?**

Akissut: Naalakkersuisut 2017-imi aalajangiipput, Illoqarfinnut allanut Nuujungitsumut
suliffeqarfinnik nuussuinissaaq Naalakkersuisut pingaarnertut anguniagarissagaat.
Taamaaliornikkut siunertaavoq nukissat periarfissallu nunatsinni tamarmiittut
iluaqutigineqalernissaat nunatsinnilu tamarmi najukkani assigiinngitsuni
ineriartortitsilernissaaq suliffissaqartitsilernissarlu.

15-02-2018
Allakkat nr. 7220720
Postboks 1029
3900 Nuuk
Oqarasuaat: +299 34 50 00
Fax.: +299 32 20 73
Email: ikiin@nanoq.gl
www.nanoq.gl

Naalakkersuisut Eqqumiitsuliornermik Ilinniarsiup Aasiannut nuunneqarneratigut pitsaasumik sunniivigeqatigiittoqalernissaa takusinnaavaat, tassanimi kissaatigineqarmat Eqqumiitsuliornermik Ilinniarsiup Aasianni GUX-imik pisiaaqassappat inissatigut qaninnerusumik suleqateqalernissaa periarfissaqassappallu ilinniartitsisutigutaaq, tassami GUX Aasiaat sammisassaqartitsinerik aallutaqarmat assersuutigalugu soorlu nipilersornermik, assilialiornermik, tusagassaqartitsinerik - attaveqatigiinnermik ingerlatitseqqittarnermillu.

Taamaammat Naalakkersuisut illutaasigut ilinniartitsisutigullu GUX Aasiaat qaninnerusumik suleqatigisinnaanarlugu periarfissaqarnersoq misissorniartaat assilialiornermi suliamut tunngatillugu avatangiisit nukittorsarneqarnissaat inissaqarnerulernissarlugu siunertarlugit taamaalillutillu amerlanerusut pitsaanerusumik ilinniartitaanissaat qulakkeerniarlugu.

Tamakku saniatigut Naalakkersuisut Eqqumiitsuliornermik Ilinniarsiup neqeroorutigisartagai annertusineqarsinnaanersut misissorneqallaqqaat taamaalilluni siunissami assilialiornermik piviusorsiornermik tunngaviumik ilinniartitsisooqartalersinnaaniassammat.

Taamaammat Naalakkersuisut suleqatigiissitamik pilersitsiniarput GUX Aasiaat qaninnerusumik suleqatigineqalersinnaanersooq taamatullu Eqqumiitsuliornermik Ilinniarsiup neqeroorutigisartagai annertusineqarsinnaanersut misissuisussamik.

Ukiumi aningaasaliiviumi 2018-imi Aasianni illuliassamik nutaamik imaluunniit illooreersumik allangortiterinissamik pilersaaruserneq aallartinneqassasoq Naalakkersuisut naatsorsuutigaat. Kisiannili sanaartornissamik aatsaat aalajangiisoqavissaaq Inatsisartut aningaasanut inatsisissani aningaasanik atugassanngortitsissappata.

Taamaammat Eqqumiitsuliornermik Ilinniarsiup nuunneqarnissaanut Aasianni ilinniarsiup qaqugu illutassaqalernissaa apeqqutaasussaassaaq.

2. Ilinniartut amerlanerusut tiguneqartalernissaat pilersaarutigineqarpa?

Akissut: Naalakkersuisut assilialiornermik ilinniartut amerlanerusut tiguneqartalernissaat kissaatigaat.

Ukiumut ilinniartut tallimanit amerlanerusut tiguneqartalernissaat naatsorsuutigineqarpoq, tassami Nuummi ukiumut ilinniartut tallimat tiguneqartarnissaannik killiliussamit marloriaammik amerlanerusut tiguneqarsinnaallutik

qinnuteqartarmata. Eqqumiitsuliornermik Ilinniarfimmi ukiumi ilinniarfiusussami ilinniartunngorniarlutik qinnuteqartartut agguaqatigiissillugu 15-it 18-inillu akornanniittarput.

Eqqumiitsuliornermik Ilinniarfiup Aasiannut nuunneqarneratigut - ilinniarfiup anginerusunik pitsaanerusunillu illutaqalernissaa siunertaralugu - ilinniarfimmi ilinniartunngortut amerlanerusut tiguneqarsinnaasalissapput. Taamaalillutik Naalakkersuisut naatsorsuutigaa ilinniartunngorniarlutik tiguneqartartut marloriaatinngornissaat Eqqumiitsuliornermik Ilinniarfik Aasianni nutaanik illutassaqaleriarpat.

3. Eqqumiitsuliornermut ilinniarfiup Aasiannut nuunneqarnissaa ilutigalugu nipilersornermik ilinniarfittalerlugu sananeqassagaluaruni tamanna nunatta karsianut qanoq naleqassagaluarpa? Uani eqqarsaatigaara eqqumiitsuliorner-mik ilinniarfiup ilinniartorisartagaata amerlaqataatut amerlatigisunik ilinniartoqarsinnaasumik inuusuttunut, inersimasunullu musikhøjskolitit ittumik ilaneqassagaluaruni..

Akissut: Naalakkersuisut maannakuugallartoq Nipilersornermut Ilinniarfimmik imaluunniit Nipilersornermut Højskolemik Aasianni pilersitsisoqarnissaanik toqqaannartumik pilersaaruteqanngillat.

Borgmester Ane Hansen, Kommune Qeqertalik, ulloq 23. januar 2018-imi tusagassiorfinnut nalunaaruteqarluni oqarpoq kommunimi siunissami Aasianni Eqqumiitsuliornermik Ilinniarfiup Nipilersornermut Ilinniarfimmik ilaqalersinnaanera eqqarsaatissatsialaasoq.

Eqqumiitsuliornermik Ilinniarfiup nuunneqarneratigut siunissamilu Aasianni Nipilersornermut Ilinniarfimmik pilersitsisoqarneratigut aammattaaq maani nunatsinni eqqumiitsulioriaatsinut assigiinngitsunut allanut tunngatillugu illoqarfik illoqarfittut ilinniarfeqarfiusutut nukittorsarneqassaaq.

Inussiarnersumik Inuulluaqqusillunga


Doris J. Jensen